



(Profesor Madya dan Timbalan Dekan, Fakulti Kepimpinan dan Pengurusan, Universiti Sains Islam Malaysia)

Dr **Mohd Yahya Mohd Ariffin**

Peluang untuk menjadi pendidik

Ketika penulis belajar di sekolah rendah dulu, guru-gurunya hanya berkelulusan peringkat sijil atau diploma perguruan saja, namun kini semakin ramai yang berkelulusan Ijazah Sarjana Muda Perguruan.

Peningkatan taraf kelulusan akademik pendidik atau guru-guru sekolah rendah menunjukkan Kementerian Pelajaran Malaysia (KPM) sangat mementingkan mutu pendidikan yang diberi kepada anak-anak Malaysia.

Bertepatan dengan pengumuman keputusan Sijil Pelajaran Malaysia (SPM) 2012 pada 21 Mac lalu, KPM membuka peluang kepada lepasan sijil itu yang berminat memilih kerjaya sebagai guru sekolah rendah.

Walaupun calon berkeinginan akan menjadi guru lima tahun akan datang (2018), perancangan KPM itu bertujuan menampung keperluan guru-guru ketika itu akibat pertambahan sekolah rendah seiring meningkatnya bilangan murid selain untuk menggantikan guru-guru yang bersara.

Berdasarkan iklan KPM yang disiarkan oleh beberapa akhbar harian utama pada Ahad lepas, KPM mempelawa calon lepasan SPM, lulusan Unified Examination Certificate (UEC) dan Sijil Menengah Agama (SMA) atau Sijil Menengah Ugama (SMU) yang berkelayakan,

berpotensi, berminat dan beriltizam untuk mengikuti program Ijazah Sarjana Muda Perguruan dengan Kejujuran.

Pada setiap tahun, lazimnya lebih 100,000 calon memohon untuk mengikuti program Sarjana Muda Perguruan di Institut Pendidikan Guru (IPG) seterusnya menyertai profesion paling popular itu. Begitulah hebatnya daya tarikan profesion guru di negara ini.

Selepas tamat mengikuti program ini, mereka akan dilantik sebagai guru dan ditawarkan gaji dan elaun sekitar RM3,000 sebulan. Jika berkhidmat di pedalaman mereka akan menerima elaun tambahan sebanyak RM1,500 sebulan. Selain itu, guru yang menunjukkan prestasi cemerlang akan mudah dinaikkan pangkat.

Dari semasa ke semasa

“**PENINGKATAN TARAF KELULUSAN AKADEMIK PENDIDIK ATAU GURU-GURU SEKOLAH RENDAH MENUNJUKKAN KEMENTERIAN PELAJARAN MALAYSIA (KPM) SANGAT MEMENTINGKAN MUTU PENDIDIKAN YANG DIBERI KEPADA ANAK-ANAK MALAYSIA**”

KPM di bawah menterinya yang juga Timbalan Perdana Menteri, Tan Sri Muhyiddin Mohd Yassin menambah baik skim perkhidmatan perguruan termasuk kenaikan pangkat, elaun serta ganjaran kewangan yang menunjukkan profesion itu sentiasa mendapat keistimewaan daripada kerajaan.

Tempoh dan pengkhususan
Program ini mengambil masa lima tahun iaitu setahun untuk program persediaan, manakala empat tahun lagi untuk program ijazah. Program ini dijalankan di IPG, KPM.

Maklumat KPM menunjukkan kali ini bidang pengkhususan yang ditawarkan untuk mata pelajaran di sekolah kebangsaan (SK), sekolah jenis kebangsaan Cina (SJKC) dan sekolah jenis kebangsaan Tamil (SJKT).

Pengkhususan untuk SK ialah Bahasa Melayu,

Bahasa Inggeris, Matematik, Sains, Pendidikan Khas, Pendidikan Islam, Bimbingan dan Kaunseling, Bahasa Cina, Bahasa Kadazan Dusun, Prasekolah, Pendidikan Jasmani, Pendidikan Seni Visual, Sejarah, Muzik, Pemulihan, Reka Bentuk dan Teknologi, Bahasa Tamil, Bahasa Arab dan Bahasa Iban.

Bagi SJKC pula ialah Bahasa Melayu, Bahasa Inggeris, Matematik, Sains, Pendidikan Khas, Pendidikan Islam, Bimbingan dan Kaunseling, Pengajian Cina, Prasekolah, Pendidikan Jasmani, Pendidikan Seni Visual, Sejarah, Muzik, Pemulihan serta Reka Bentuk dan Teknologi.

Sementara SJKT, KPM menawarkan Bahasa Melayu, Bahasa Inggeris, Matematik, Sains, Pendidikan Khas, Pendidikan Islam, Bimbingan dan Kaunseling, Pengajian Tamil, Prasekolah, Pendidikan Jasmani, Pendidikan Seni Visual, Sejarah, Muzik,

Pemulihan serta Reka Bentuk dan Teknologi.

Syarat kemasukan

Calon lepasan SPM yang berminat perlu mendapat keputusan cemerlang dalam mana-mana tiga mata pelajaran dan sekurang-kurangnya tiga mata pelajaran berikut iaitu Bahasa Melayu, Sejarah, satu mata mata pelajaran lain serta lulus Bahasa Inggeris.

Bagi lulusan UEC calon perlu memiliki sekurang-kurangnya tiga kepujian pada peringkat Sijil Senior Middle Level (UEC-SML), manakala calon lulusan SMA atau SMU perlu memiliki sekurang-kurangnya tiga kepujian.

Selain syarat akademik, untuk terpilih calon perlu sihat fizikal dan mental selain aktif dalam kegiatan kokurikulum. Bagaimanapun, calon perlu mempunyai minat yang mendalam untuk menjadi guru, memiliki sifat sabar dalam mendidik pelajar, berkeperibadian mulia, kebolehan berkomunikasi, mampu menghadapi cabaran dunia pendidikan selain bersedia untuk berkhidmat tanpa mengira tempat khususnya luar bandar atau pedalaman.

Seperti kebanyakan profesion lain, setiap guru dalam tugas seharian harus berpegang kepada etika dan tata-susila profesion perguruan supaya tidak lari daripada matlamat murninya.